

欽定禮記義疏

第四
函
八冊

欽定禮記義疏卷第七十三

大學第四十二

陸氏德明曰鄭云大學者以其記博學可以爲政也

孔氏穎達曰案鄭目錄云名曰大學者以其記博學可以爲政也。此於別錄屬通論。此大學之篇論學成之事。能治其國章明其德於天下。卻本明德所由先從誠意爲始。朱子曰子程子曰大學孔氏之遺書而初學入德之門也。於今可見古人爲學次第者獨賴此篇之存而論孟次之學者必由是而學焉則庶乎其不差矣。

案

大學一篇亦不用正義存疑等六條同中庸例其案語

已詳中庸卷首暨卷末。

大學之道在明明德在親民在止於至善知止而后有定定而

后能靜靜而后能安安而后能慮慮而后能得物有本末事有

終始知所先後則近道矣

釋文大舊音泰劉直帶反近附近之近朱注程子曰親當作新后後同後

放此

案朱本分在止於至善節慮而后能得節則近道矣節作三節其注語于各節末仍空一字界斷同中庸例

鄭氏康成曰明明德謂在明其至德也止猶自處也得謂得事之宜也

孔氏穎達曰大學至道矣此經大學之道在於明明德在於親民在止於至善積德而行則近於道也在明明德者言

大學之道在於章明己之光明之德謂身有明德而更章顯

之此其一也在親民者言大學之道在於親愛於民是其

二也在止於至善者言大學之道在止處於至善之行此

其三也言大學之道在於此三事矣知止而后有定者更

覆說止於至善之事。既知止於至善而后心能有定。不有差貳也。定而后能靜者。心定無欲。故能靜不躁求也。靜而后能安者。以靜故情性安和也。安而后能慮者。情既安和。能思慮於事也。慮而后能得者。既能思慮。然後於事得宜也。物有本末。事有終始者。若於事得宜。而天下萬物有本有末。經營百事有終有始也。知所先後者。既能如此。天下百事萬物皆識知其先後也。則近道矣者。若能行此諸事。則附近於大道矣。

朱子曰。大學者。大人之學也。明明之也。明德者。人之所得乎天。而虛靈不昧。以具眾理而應萬事者也。但爲氣稟所拘。人欲所蔽。則有時而昏。然其本體之明。則有未嘗息者。故學者

當因其所發而遂明之。以復其初也。新者革其舊之謂也。言
既自明其明德。又當推以及人。使之亦有以去其舊染之污
也。止者必至於是而不遷之意。至善則事理當然之極也。言
明明德新民皆當止於至善之地而不遷。蓋必其有以盡夫
天理之極。而無一毫人欲之私也。此三者大學之綱領也。

止者所當止之地。卽至善之所在也。知之則志有定向。靜謂
心不妄動。安謂所處而安。慮謂處事精詳。得謂得其所止。

明德爲本。新民爲末。知止爲始。能得爲終。本始所先。末終所
後。此結上文兩節之意。

古之欲明明德於天下者。先治其國。欲治其國者。先齊其家。欲
齊其家者。先脩其身。欲脩其身者。先正其心。欲正其心者。先誠

其意欲誠其意者先致其知

朱注治平聲釋文其知如字徐音智下致知同案朱本合下致知

在格物句作一節其注語總見下載大文之末同中庸例

鄭氏康成曰知謂知善惡吉凶之所終始也

孔氏穎達曰古之欲明明德於天下者前章言大學之道在明德親民止善覆說止善之事既畢故此經說明明德之理先治其國者此以積學能爲明德盛極之事以漸到今本其初故言欲章明己之明德使徧於天下者先須能治其國

欲治其國者先齊其家也欲齊其家者先脩其身言若

欲齊家先須脩身也欲脩其身者先正其心言若欲脩身

必先正其心也欲正其心者先誠其意者總包萬慮謂之

心爲情所意念謂之意若欲正其心使無傾邪必須先至誠

金定禮言章句 卷十一 三
在於意念也。若能誠實其意，則心不傾邪也。欲誠其意者，

先致其知者，言欲精誠其己意，先須招致其所知之事。言初
始必須習學，然後能有所知曉其成敗，故云先致其知也。

致知在格物。

釋文格古百反

鄭氏康成曰：格，來也。物猶事也。其知於善深，則來善物；其知
於惡深，則來惡物。言事緣人所好來也。此致或爲至。

孔氏穎達曰：致知在格物。此經明初以致知積漸而大至明
德。前經從盛以本初，此經存初以至盛，上下相結也。致知在
格物者，言若能學習招致所知格來也。已有所知，則能在於
來物。若知善深，則來善物；知惡深，則來惡物。言善事隨人行
善而來，應之惡事隨人行惡亦來，應之言善惡之來緣人所

好也

朱子曰明明德於天下者使天下之人皆有以明其明德也
心者身之所主也誠實也意者心之所發也實其心之所發
欲其必自慊而無自欺也致推極也知猶識也推極吾之知
識欲其所知無不盡也格至也物猶事也窮至事物之理欲
其極處無不到也此八者大學之條目也

物格而后知至知至而后意誠意誠而后心正心正而后身脩
身脩而后家齊家齊而后國治國治而后天下平自天子以至
於庶人壹是皆以脩身為本其本亂而末治者否矣其所厚者
薄而其所薄者厚未之有也此謂知本此謂知之至也

釋文治直吏反

案朱注釋音同釋文者概不重出同中庸例朱本分國治而后天下平節壹是皆以脩身為本節未之有也節作三

節末二句朱本移在聽訟章後爲傳之第五章此謂知本
程子曰衍文也此謂知之至也朱注云此句之上別有闕文
此特其結語耳

鄭氏康成曰壹是專行是也

孔氏穎達曰物格而后知至者物既來則知其善惡所至善
事來則知其至於善若惡事來則知其至於惡既能知至則
行善不行惡也知至而后意誠既能知至則意念精誠也

意誠而后心正者意能精誠故能心正也國治而后天

下平者則上明明德於天下是以自天子至庶人皆然也

壹是皆以脩身爲本者言上從天子下至庶人貴賤雖異所
行此者專壹以脩身爲本上言誠意正心齊家治國今此獨
云脩身爲本者細別雖異其大略皆是脩身也其本亂而

末治者否矣本亂謂身不脩也末治謂國家治也言己身既
不脩而望家國治者否矣否不也言不有此事也其所厚
者薄而其所薄者厚末之有也者此覆說本亂而末治者否
矣之事也譬若與人交接應須敦厚以加於人今所厚之處
乃以輕薄謂以輕薄待彼人也其所薄者厚謂己既與彼輕
薄欲望所薄之處以厚重報己未有此事也言己以厚施人
人亦厚以報己也若己輕薄施人人亦輕薄報己言事厚之
與薄皆以身爲本也此謂知本此謂知之至也者本謂身
也既以身爲本若能自知其身是知本也是知之至極也

朱子曰物格者物理之極處無不到也知至者吾心之所知
無不盡也知既盡則意可得而實矣意既實則心可得而正

矣脩身以上明明德之事也齊家以下新民之事也物格知
至則知所止矣意誠以下則皆得所止之序也壹是一切
也正心以上皆所以脩身也齊家以下則舉此而錯之耳

本謂身也所厚謂家也此兩節結上文兩節之意右經一

章蓋孔子之言而曾子述之

凡二百五字

其傳十章則曾子之意

而門人記之也舊本頗有錯簡今因程子所定而更考經文

別爲序次如左

凡千五百四十六字

凡傳文雜引經傳若無統紀然

文理接續血脈貫通深淺始終至爲精密熟讀詳味久當見
之今不盡釋也

案朱子章句序次於聖經後移康誥曰克明德至自明也分

作四節爲傳之首章釋明明德移湯之盤銘曰至無所不用

其極分作四節爲傳之第二章釋新民移詩云邦畿千里至止於信分作三節在詩云瞻彼淇澳至沒世不忘也二節前其五節爲傳之第三章釋止於至善移子曰聽訟吾猶人至此謂知本合作一節爲傳之第四章釋本末移此謂知本此謂知之至也二句爲傳之第五章取程子之意以補之釋格物致知移所謂誠其意者至君子必誠其意分作四節爲傳之第六章釋誠意以所謂脩身在正其心者至在正其心分作三節爲傳之第七章釋正心脩身以所謂齊其家至不可以齊其家分作三節爲傳之第八章釋脩身齊家以所謂治國至此謂治國在齊其家作九節爲傳之第九章釋齊家治國以所謂平天下至以義爲利也作二十三節爲傳之第十

章釋治國平天下 篇內節次悉依注疏舊本所錄朱注亦從鄭本大文逐次分貼茲特總揭朱子章句序次俾讀者一覽而識其同異焉

所謂誠其意者毋自欺也如惡惡臭如好好色此之謂自謙故君子必慎其獨也小人閒居爲不善無所不至見君子而后厭然揜其不善而著其善人之視己如見其肺肝然則何益矣此謂誠於中形於外故君子必慎其獨也

好好上呼報反下如字謙依注讀爲嫌徐音簞反閒音閑厭反

讀厭烏斬反又烏簞反揜於檢反著張慮反肺芳廢反肝音干案朱本分上君子必慎其獨也節下君子必慎其獨也節作二節

鄭氏康成曰謙讀爲慊慊之言厭也厭讀爲壓壓閉藏貌也

孔疏謙讀爲慊以經義之理言作謙退之字既無謙退之事故讀爲慊慊不滿之貌故又讀爲厭厭自安靜也云厭讀爲

壓壓爲黑色如
爲閑藏貌也。

孔氏穎達曰所謂誠其意者自此以下至此謂知本廣明誠
意之事此一節明誠意之本先須慎其獨也。毋自欺也言
欲精誠其意無自欺誑於身言於身必須誠實也。如惡惡
臭者謂臭穢之氣謂見此惡事而嫌惡之如人嫌臭穢之氣
心實嫌之口不可道矣。如好好色者謂見此善事而愛好
之如似人好色心實好之口不可道矣言誠其意者見彼好
事惡事當須實好惡之不言而自見不可外貌詐作好惡而
內心實不好惡也皆須誠實矣。此之謂自謙者謙讀如慊
慊然安靜之貌心雖好惡而口不言應自然安靜也。見君
子而后厭然揜其不善而著其善者謂小人獨居無所不爲

見君子而後乃厭然閉藏其不善之事。宣著所行善事也。人之視己如見其肺肝然則何益矣。言小人爲惡外人視之昭然明察矣。如見肺肝雖消沮閉藏言何益矣。此謂誠於中形於外者言此小人既懷詐實惡事於中心必形見於外不可掩藏。

朱子曰誠其意者自脩之首也。毋者禁止之辭。自欺云者知爲善以去惡而心之所發有未實也。謙快也。足也。獨者人所不知而已所獨知之地也。言欲自脩者知爲善以去其惡則當實用其力而禁止其自欺使其惡惡則如惡惡臭好善則如好好色皆務決去而求必得之以自快足於己不可徒苟且以徇外而爲人也。然其實與不實蓋有宅人所不及知而

已獨知之者。故必謹之於此。以審其幾焉。閒居獨處也。厭然。消沮閉藏之貌。此言小人陰爲不善。而陽欲揜之。則是非不知善之當爲。與惡之當去也。但不能實用其力。以至此耳。然欲掩其惡。而卒不可掩。欲詐爲善。而卒不可詐。則亦何益之有哉。此君子所以重以爲戒。而必謹其獨也。

曾子曰。十目所視。十手所指。其嚴乎。富潤屋。德潤身。心廣體胖。

故君子必誠其意。

釋文。胖。步丹反。平節。故君子必誠其意。節。作二節。

案朱本。分其嚴。

鄭氏康成曰。嚴乎。言可畏敬也。胖。猶大也。三者言有實於內。顯見於外。

孔氏穎達曰。曾子曰。十目所視者。此經明君子脩身。外人所視。不可不誠其意。作記之人。引曾子之言。以證之。十目所視。

十手所指者言所指視者眾也。十目謂十人之目。十手謂十人之手也。其嚴乎者既視者及指者皆眾其所畏敬可嚴憚乎。富潤屋德潤身者言此二句爲喻也。言家若富則能潤其屋有金玉又華飾見於外也。德潤身者謂德能濡潤其身使身有光榮見於外也。心廣體胖者言內心寬廣則外體胖大言爲之於中必形見於外也。故君子必誠其意者以有內見於外必須精誠其意在內心不可虛也。

朱子曰引此以明上文之意言雖幽獨之中而其善惡之不可揜如此可畏之甚也。胖安舒也言富則能潤屋矣德則能潤身矣故心無愧怍則廣大寬平而體常舒泰德之潤身者然也蓋善之實於中而形於外者如此故又言此以結之。